

आकाशवाणी

1. सुर्वेदु अधिकारी अज्ज पच्छम बंगाल दे मुखमन्त्री दे तौरा पर संगंध लैगन। पच्छम बंगाल च पैहली बारी बी.जे.पी. दी सरकार बनने जा'रदी ऐ।
2. तमिलनाडू च सरकार बनाने गी लेइयै यक्को-तक्की आहली स्थिति अजें बी बरकरार ऐ।
3. सरकार नै लैफ्टिनेंट जनरल N.S. Raja Subramani हौरें गी नमां CDS नियुक्त कीता ऐ- ओ 30 मई गी अपना ओहदा साम्भगन।
4. ईरान नै संयुक्त राष्ट्र सुरक्षा परिषद च अमरीका आसेआ समर्थित मसौदा प्रस्तास गी त्रुटिपुर्ण ते राजनीति सवा प्रेरत करार दिंदे होई खाज करी दिता ऐ।
5. मौसम विभाग नै अगले दंऊ दिनें दौरान केरलम-माहे- लक्षद्वीप- कर्नाटक- तमिलनाडू- पुदुचेरी ते कराईकल च भारी बरखा दे असार दस्से न।
6. AFC दे 17 बरे कोला हेठली उम्मी दे महिला एशिया कप फुटबाल च पैहली बारी क्वाटर फाईनल च पुज्जियै भारत नै इतिहास रचेया ऐ।
7. ते आई.पी.एल च अज्ज राजस्थान दा मकाबला गुजरात कन्नै। कल कोलकाता नै दिल्ली कैपिटल्स गी 8 विकेटें कन्नै हराया।

<><><><><><>

WB- Swearing in

सुर्वेदु अधिकारी अज्ज पच्छम बंगाल च बी.जे.पी. दे पैहले मुखमन्त्री दे तौर पर संगंध लैडन। शपथ ग्रैहण समारोह कोलकाता दे ब्रिगेड परेड ग्राउंड च होग। प्रधानमन्त्री नरेन्द्र

मोदी- गृह मंत्री अमित शाह- बी.जे.पी दे राश्ट्री अध्यक्ष नितिन नवीन- केन्द्री मंत्री ते NDA दी सत्ता आले राज्यें दे मुखमन्त्री बी इस शपथ ग्रहण समारोह च शामिल होई सकदे न। एदे शा पैहले सुर्वेदु अधिकारी होरेंगी कल राज्य बी.जे.पी. विधायक दल दा नेता चुनेआ गोआ। विधायक दल दी बैठक कोलकाता च गृहमन्त्री अमित शाह हुंदी मजूदगी च होई। बैठक दी प्रधानता करदे होई श्री शाह होरें आखेआ जे सुर्वेदु अधिकारी हुंदे पक्ख च सब्भै प्रस्तास हासल होए न। मगरा सुर्वेदु अधिकारी होरें गवर्नर R.N. रवि हुंदे नै मलाटी करियै राज्य च सरकार बनाने दा दावा पेश कीता। ध्यानजोग ऐ जे BJP ने असेम्बली चुनाएं च ऐतिहासिक जित दर्ज करदे होई TMC दे 15एं बरे दे शासन दा अंत कीता ऐ।

<><><><><><>

TN- Poll Uncertainly

तमिलनाडू च TVK दे प्रमुख सी. जोसेफ विजय हुंदे नेतृत्व च सरकार गठन गी लेइयै यक्को-तक्की बनी दी ऐ। IUML ने TVK गी सरकार बनाने च समर्थन देने आली खबरें गी खारज करी दिता ऐ। रिपोर्ट मूजब अज्ज शपथ ग्रहण समारोह नैई होग। प्रोफैसर खादर मोहिद्दीन हुंदे नेतृत्व आहली Indian Union Muslim League ने आखेआ ऐ जे उन्दी पार्टी ने तमिनालडू वेत्री कड़गम गी समर्थन आली चिट्ठी नैई दिती ऐ। इक प्रैस विज्ञप्ति च पार्टी नै आखेआ ऐ जे ओह नमीं सरकार दे गठन दा समर्थन करदी ऐ कीजे DMK प्रमुख M.K. Stalin चाहंदे हे जे गवर्नर नमीं सरकार दे शपथ ग्रहण गी सुगम बनाने लेई गैही पुट्टन।

<><><><><><>

New CDS

सरकार नै लैफ्टिनेंट जनरल एन.एस. राजा सुब्रहमनी होरें'गी भारत दा अगला चीफ ऑफ डिफेंस स्टॉफ नियुक्त कीता ऐ। रक्षा मंत्रालय आसेआ जारी जानकारी मुजब लैफ्टिनेंट जनरल सुब्रहमनी CDS दा ओहदा साम्भने पर सैन्य मामले सरबन्धी मैहकमे दे सचिव दे तौरा पर बी अपनी जिम्मेदारी साम्भगन। मजूदा CDS लैफ्टिनेंट जनरल अनिल चौहान हुंदा कार्जकाल 30 मई गी मुक्का रदा ऐ जिंदे बाद Lt. Gen. राजा सुब्रहमनी होर भारत दे नमें CDS होगन। राजा सुब्रहमनी होर एल्लै राष्ट्रीय सुरक्षा परिषद सचिवालय च सितम्बर 2026 थमां सैन्य सलाहकार दे महत्वपूर्ण ओहदे पर अपनियां सेवां देया रदे न। जुलाई 2024 थमां जुलाई 2025 तगर ओ सेना दे उपमुख्य यानि वाइस चीफ ऑफ आर्मी स्टॉफ ते मार्च 2023 थमां जून 2024 तगर केन्द्री कमान दे जनरल आफिसर कमांडिंग इन चीफ दे ओहदे पर बी रेही चुके दे न। एहदे इलावा उ'नें पाकिस्तान ते चीन कन्नै लग्गदे पच्छमी ते उत्तरी बन्ने पर बी कारवाइयें सरबन्धी महत्वपूर्ण भूमिका निभाई दियां न।

<><><><><><>

US Iran -Stand Off

ईरान ने संयुक्त राष्ट्र सुरक्षा काउंसिल च अमरीका आसेआ समर्थित मसौदा प्रस्ताव गी त्रुटिपूर्ण ते राजनीतिक रूप कन्नै प्रेरित करार दिंदे होई खारज करी दिता ऐ। ईरान ने इसी अपने अंदरूनी मामलें च दखल ते अमरीकी हितें गी पूरा करने आली गैह करार दिता ऐ। अमरीका- बहरीन- सऊदी अरब- UAE- कुबैत ते कतर आसेआ समर्थित इस मसौदा प्रस्ताव दा मकसद होर्मुज जलडमरु मध्य थमां आओ-जाई गी सखल्ला बनाना

ऐ। अमरीका नै ईरान पर कारोबारी जल मार्ग गी रोकने ते समुन्द्री ट्रांसपोर्ट गी अस्थिर करने दा आरोप लाया ऐ- जिसले के ईरान ने आखेआ ऐ जे जंग खत्म करियै गै स्थिरता दी बता पर अगड़ा बधेया जाई सकदा ।

<><><><><><>

(Add) Iran –US Conflict

तोंआई ईरान दी फौज दा आखना ऐ कि अमरीकी रक्षाबलें UAE दे फुजैराह बंदरगाह कश इक इरानी तेल टैंकर ते इक होर समुन्द्री जहाज गी नशाना बनाया ऐ। पच्छमी तेहरान पर ईरान ब्हाई रक्षा प्रणालियां सक्रिय हियां- जिंदे कारण काफी हद्द तगर बचाव होई गया ऐ। अमरीकी सेना दा आखना ऐ कि होर्मुज जलडमरू मध्य च ओहदी नोसेना गी ईरानी बलें आसेया मिसाईल ड्रोन ते तेज किशितियें दे हमले दा सामना करना पेया ऐ।

<><><><><><>

EAM -Guyana Visit

विदेशमंत्री डाक्टर एस. जयशंकर होरें कल गुयाना दे सेहतमंत्री हुंदे नै मलाटी कीती ते भारत गुयाना बश्कार सेहत क्षेत्र च सरबंधें ते साथ-सहयोग दे बारे च चर्चा कीती। कैरेबियन मुल्खें दे त्रंऊ दिनें दे दौरें पर गेदे डाक्टर जयशंकर होरें गुयाना दे जॉर्ज टाऊन च उत्थू दे सेहत मंत्री डाक्टर एंथोनी फ्रैंक हुंदे कन्ने मलाटी दौरान सेहत क्षेत्र च साथ-सहयोग बधाने सरबंधि बक्ख-बक्ख पैहलुएं पर बी सोच-विचार कीता। इस दौरें दौरान पैहले ओ जमाइका गे ते ओहदे बाद सुरीनाम दा दौरा कीता। अज्ज उन्दा त्रिनीदाद ते मगरा टोबागो जाने दा कार्यक्रम ऐ।



Weather

मौसम विभाग नै अगले दंऊ दिनें लेई केरलम-माहे- लक्षद्वीप- दक्खनी कर्नाटक- तमिलनाडू- पुदुचेरी ते कराईकल च बारी बरखा पौने दे असार दस्से न। तोंआई पूर्वी उत्तर प्रदेश- मध्य महाराष्ट्र- मध्य प्रदेश- मराठवाड़ा- उपहिमालीय पच्छिम बंगाल- सिक्किम ते आंध्र प्रदेश दे समुन्द्री इलाकें च शमानी बिजली पौने दी बी शेंका जताई गई ऐ। ओड़िशा-रायल सीमा- तेलंगाना-कोंकण-गोआ- कर्नाटक दे समुन्द्री इलाकें- अंडमान निकोबार द्वीप समूह ते पूर्वोत्तर राज्यें च बी मौसम इस्सै चाली दा बने रौहने दे असार दस्से गे न। गुजरात ते पच्छिमी राजस्थान च वीरवार तगर लू चली सकदी ऐ। मैहकमे नै कल्लै तगर देशा दे पच्छिमी ते उत्तर पच्छिमी हिस्सें च दिनें दा बदोबद तापमान 2 कोला 5 डिग्री तगर बदी सकने दी पेशनगोई कीती ऐ ते लोकें गी उस्सै साहबै जरूरी एहतियात बरतने दी सलाह दिती गई ऐ।



U-17 Asia Cup

फुटबाल च भारत नै कल चीन दे सूजऊ च लेबनान गी 4-0 कन्नै रहाइयै AFC अंडर सेवनटीन महिला एशियाई कप दे क्वाटर फाइनल च अपनी थाहर पक्की करियै इतिहास रची दिता ऐ। 17एं बरे कोला हेठली उमी दी इस प्रतियोगिता च भारत लेई प्रीतिका बर्मन ने 7में ते 85में मिन्ट च अल्वा देवी सेन्जाम नै 36में मिन्ट च ते जोया नै 72में मिन्ट च गोल कीते। इस टूर्नामेंट दे सैमिफाइनल च पुज्जने पर भारत 2026 फीमा अंडर 17 महिला विश्व कप च अपनी थाहर बनाई लैग।



IPL Cricket

IPL च अज्ज राजस्थान रॉयल्स दा मकाबला गुजरात टाइटन्स कन्नै होग। एह मैच जयपुर च संज्रा साइडे 7 बजे शुरु होग। तोंआई कल रातीं दिल्ली दे अरुण जेटली स्टेडियम च खेइठे गेदे इक मैच च कोलकाता नाइट राईडर्स नै दिल्ली कैपिटल्स गी 8 विकेटें कन्नै हराई दिता। पैहले बल्लेबाजी करदे होई दिल्ली दी टीम 20एं ओवरें च 8 विकेटें दे नुक्सान पर 142 रन्ज बनाए। परते च 143 रन्ज दे लक्ष दा पिच्छा करदे होई कोलकाता दी टीम नै 15में ओवर च गै 147 रन्ज बनाइयै मैच जिती लैता। फिन एलन नै 47 गेंदे च 100 रन्ज बनाए जेहदे लेई उसी प्लेयर ऑफ द मैच चुनेआ गेआ। उप्परोतली चौथी जित दे कन्नै गै कोलकाता दी टीम अंकतालिका च 7में नम्बर पर पुज्जी गई ऐ। इस सीज़न च कोलकाता दी शुरुआत बड़ी माड़ी रेही ते पैहले 6एं मैचें चा उसी 5 च हार दा सामना करना पेया हा ते इक मैच च बिजन हार जित-हार दे फैसले कारण उसी इक अंक हासल होआ हा।

